



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

07 Juin 2019

03 Shawwal 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

L'APRÈS-RAMZAAN

Nous invité de marque, ki nous Créateur fine accorde nous fine quitte nous. En vérité, mois béni Ramzaan fine terminé et ene nouvo mois fine vini, le mois de Shawwal. Sa capave chagrine certains dimounes, tandis ki pour bane les autres, bane ki pas réellement ena sa l'esprit de sacrifices là, sa bane là astaire là zot soulager ki sa mois là fine aller et ki zot pé retourne dans zot ancien condition.

Pour ene vrai croyant, c'est vrai ki li triste ki sa mois là fine aller mais li aussi ene opportunité pour li pour contigner dans bane bons l'habitudes ki li fine prend pendant sa mois béni là et pour contigner fer sa, tout au long de l'année. Et dans sa façon là, li assure li ki tous so bane actions, et so bane pensées zot diriger vers Allah et vers faire Li plaisir.

Dans sa siècle ki nous pé vivre là, sa bane récompenses là zot doubler, tribler aller même parski celui ki fine gagne l'opportunité et la bénédiction pou accepter le Messenger, le Khalifa ki Allah Li-même fine envoyer avec le *Rouh'il Qouddous*, alors celui là li bien chanceux. Sa c'est parski so la vie en entier, tout au long de la vie de sa Messenger d'Allah là li gagne sa *Laila-tul-Qadr* spécial là ki durer pendant so la

vie en entier. Li vine témoin de bane miracles et de bane signes d'Allah. Et li gagne ene proximité avec Allah ki bane les autres pas fine gagner, et li gagne sa grâce à so connexion avec le Messenger d'Allah ki fine vini avec le *Rouh'il Qouddous*. So la vie entier li non seulement couma le mois Ramzaan, mais plus précisément sa la nuit béni de *Laila-tul-Qadr* là. Et plus grand *Laila-tul-Qadr* ki bane Sahaba à l'époque de Nabi Kareem Hazrat Muhammad (saws) fine gagner, c'est ki zot fine vivre pendant l'époque de sa plus grand Messenger d'Allah là et zot fine gagne l'honneur, bane grâces et bane bénédictions pou reste sincères avec li et pou mort dans le chemin d'Allah couma bane vrais croyants. Ena beaucoup ti hypocrites aussi, mais sa bane là zot bane plans ti floppe et c'est Allah So Rassool et bane croyants musulmans sincères ki fine gagne la victoire.

Alors, pareil couma kan mois Ramzaan vini, ou demande ou-même, eski mo pou trouve Ramzaan prochain ? Eski mo pou vivant l'année prochaine afin ki mo gagne bane tels bénédictions ? Pareillement, tous bane dimounes dans sa siècle là et dans tous siècle de bane Envoyés d'Allah dans la religion finale de l'Islam, bane ki pou vini pour la réforme de l'Islam, de bane musulmans, et de l'humanité en entier, bane ki pou faire revivre la foi ki bane ki après nous pou piétiné, alors sa bane dimounes ki fine croire dans bane Messagers d'Allah, bane prophètes islamiques là, zot aussi zot bizin mette sa dans zot l'esprit, ki sa faveur ki Allah fine accorde zot azordi jour, kot Li fine donne zot la chance pou zoine ene Messenger d'Allah, pou vivre dans so l'époque, mais zot ki zot faire ? Zot tourne les dos ! Et si arriver zot mort dans sa condition kot Allah fine faire le *Rouh'il Qouddous* dessane pou béni bane dimounes, mais zot, zot fine priver de sa, zot fine tourne les dos avec Allah et So Envoyé ! Ki pou arriver ? Ki ou sentence pou été ? Li bien malheureux pou ene tel dimoune, et ki de surcroît moque ene Messenger et faire li toute sorte kalité du tort. Mais en vérité, couma Allah dire dans Quran :

« En vérité, c'est Moi et Mo bane Messagers ki pou gagne la Victoire. » (Al-Mujadala 58 : 22).

Et Allah rassure bane croyants aussi ki malgré ki kalités plans bane malfaiteurs capave faire, mais Allah So plan Li bien meilleure. Allah veille lor So bane serviteurs et aide zot dans zot bane malheurs. Mais Li tester zot aussi. Faudé pas ki ene croyant li décourager kan li passe par bane épreuves. Pareil couma pendant Ramzaan nous ena pou faire bane sacrifices de toutes sortes afin pour nous gagne Allah, alors penser ki pendant l'époque d'ene Envoyé, d'ene Élu d'Allah, Allah

tester bane croyants avec toutes sortes kalités épreuves. Li éprouve zot avec la mort, la peur, perte et ene diminution dans zot bane dibiens et Li donne zot toutes sortes kalités épreuves. Li donne zot tous sa là pou guetter si pas zot ti vraiment sincère envers Li et So Messager ou seulement sa ti zis lors ou la lèvres seulement.

Mo bizin dire, Allah fine faire beaucoup teste avec So bane serviteurs, et surtout dans sa siècle là avec So Khalifatullah même et bane disciples de So Khalifatullah. Ena ki fine vine de l'avant après ki zot fine gagne signes, et zot fine vine de l'avant pou signe le forme de *Bai'at*, mais ki arriver ensuite ? Kan bane l'ennemies apprane de sa bane kalités dimounes là zot acceptation de la Manifestation Divine de sa siècle là, zot alle devire zot la tête et attire zot avec bane bel postes et l'argent pou fer zot quitte la Manifestation Divine et retourne dans zot ancien poste ou sois donne zot ene meilleure poste pou bouche zot lizié. Couma dire, *Soummoum Boukmoum...*

Sa bane dimounes ki faible dans zot la foi, ki largue la corde d'Allah facilement dès ki kitchose mondaine fine vine dans zot faveur, dans zot l'intérêt, alors sa bane kalités dimounes là zot sentence pou bien graves. Allah fine tester zot, fine donne zot signes, mais zot fine rejette la foi et coupe connexion avec So Khalifatullah. Sa ki appelle ene la mort spirituellement, et sa li ene la mort pli pire ki ene la mort physique ; parski Allah rasse tous So bane bénédiction d'ene tel dimoune, et so sentence lor la terre pou arriver dans ene moment ki li pas attane et so conséquence dans la vie future pou pli pire encore.

Alors, sak dimoune, surtout bane croyants bizin mette sa dans zot l'esprit ki bane épreuves pou vini dans zot la vie, mais si zot reste ferme et couma nous dire en créole, si nous manz avec sa bane épreuves là, et zot reste sincères, alors c'est Allah Li-même ki pou enlève sa bane obstacles ki ti lor ou chemin là, c'est Li-même ki pou ouvert sa la door de So Miséricorde kot ou pou trouve ou bane problèmes résoudre ene sel coup, couma dire zamais auparavant ou fine gagne épreuves. Sa c'est bane grâces ki Allah faire avec So bane serviteurs croyants ki sincères et ki travaille dure pour So cause.

Pareil couma dans Ramzaan ou fine garde *Roza* pou ou gagne Allah comme ou récompense, penser bien ki bane ki accepter l'Envoyé d'Allah et aide li dans so bane travaux pou faire avance la vérité de l'Islam dans le monde – le Vrai Islam –

alors c'est sa bane là ki pou réussi, et dans *Aakhérat* c'est zot ki pou chanceux parski zot pou gagne Allah comme zot récompenses à cause de bane excellents sacrifices ki zot fine faire pendant zot vivant lor la terre. Zot fine prive zot de beaucoup kitchoses, et en retour, zot pou hérite Allah Li-même, *Insha-Allah*.

C'est pour sa bane kalités dimounes là ki Allah envoie So bane bénédictions extraordinaires parski zot fine préfère sacrifier tout pour ki zot gagne Allah comme zot récompense. Pour zot, zot la vie et zot la mort pareil, parski pendant zot vivant zot fine gagne Allah, et dans zot la mort aussi zot fine gagne Allah. Couma zot fine gagne sa ? En obéissant Allah et So Messenger ! Zot suivre celui ki Allah fine envoie le *Rouh'il Qouddous* et ki Li fine élever comme So Messenger.

Alors, c'est sa valeur de Ramzaan et de *Laila-tul-Qadr* dans la vie d'ene croyant. En temps ordinaire, li ena tout so l'importance, mais durant la vie d'ene Messenger d'Allah, kot c'est Allah ki vine so lizié, so la main, so zoreilles etc., kot c'est Allah ki dirige li, alor, sa bane bénédictions là multiplier des milliers de fois, et so valeur amplifier dans tout so façon. Alors li bienheureux celui ki trouve ene tel l'époque et ki aide la cause d'Allah en acceptant et aidant So Messenger.

Donc, couma mo ti pé dire concernant Ramzaan, ene croyant bizin contigner so bane bons l'habitudes, même après Ramzaan. C'est dans sa l'après-Ramzaan là ki Allah pou guette ou sincérité, si pas Ramzaan ti ene prison pou ou ou sois li ti ene vrai trésor et ene opportunité pou rédresse ou lor le chemin d'Allah.

Et ene croyant bizin toujours penser, « *Et si sa ti mo dernier Ramzaan?* » Parski li bizin toujours mazer ki la mort toujours là, à côté de sak dimoune. Sa li ene kitchose inévitable. Ou lé ou pas oulé, la mort fine prescrire pou tous dimounes. Tous dimounes pou bizin quitte sa le monde là ene jour.

Allah (swt) fine toujours recommande nous pou être optimiste dans nous la vie lor sa la terre là. Alor zot bizin ferme dans zot bane convictions pou apporte ene changement radical dans zot la vie de tous les jours. Sak dimoune bizin conne fer ene analyse de li-même. Li capave pose milles questions, mais la plupart du temps, sa bane réponses là li trouve avec li-même. Li tousel li conner ki bane actions ki li fine fer et avec ki l'intention li fine fer sa, et ene jour na pas ene jour li pou bizin alle rendre compte de tous sa là devant Allah. Et là-bas, devant Allah, li pou tousel. Li pas pou conne aucaine dimoune. Li pou guette zis pou li. Pas pou

ena ni papa, ni mama, ni aucaine les autres dimounes pou vine sappe li. Tout pou passer entre li et Allah.

Si sakaine dans l'*Ummah* de Hazrat Muhammad (saws) réussi faire ene l'inventaire positif avec bane réflexions sincères lor la valeur spirituelle du mois de Ramzaan couma ene l'école de la foi, couma ene pause spirituelle kot li ressource li-même pour le reste de la vie, sa en li-même li déjà ene victoire... Ene très zoli victoire ki li gagne pou refaire so la vie, pou façonne li dans ene meilleure façon, comme ene excellent préparation pour *Aakhérat*. *Insha-Allah*.

Zot tous alors dans l'*Ummah*, vié génération, génération du jour présent et celui de l'avenir bizin absolument ena la conviction ferme, kot zot dire avec zot-mêmes ki : « *À partir de maintenant mo la vie de tous les jours bizin ene la vie ki mo vivre pareil couma pendant le mois de **RAMZAAN**.* » - Avec la Prière. Bane bons actions. Avec ene contrôle de soi-même. Reste loin avec bane kitchoses pervers, bane kitchose ki pou éloigne nous d'Allah. Pou reste dans l'obéissance d'Allah, et pou suivre tous So bane commandements. Zot bizin toujours prêts pou servir la cause de l'Islam et pou vivre ene la vie tout à fait islamique, et non pas suivre bane tendances de bane non-croyants, ki zot, zot loin du chemin d'Allah. Au contraire li zot devoir pou aide sa bane là pou trouve le chemin d'Allah et pou change zot bane mauvais pratiques en bane bons pratiques.

C'est pas seulement durant mois Ramzaan ki le jeûne (*Roza*) li recommandé. Tout comme bane bons actions, bane bons travaux, *Roza* faire partie de la vie quotidien de sak membre de l'*Ummah* Muhammadiyya. Et nous bizin prend conscience de sa.

Le Saint Prophète Muhammad (saws) ti ena l'habitude pou garde *Roza* bane lundis et jeudis de sak semaine, li ti pé garde *Roza* dans 13^{ème}, 14^{ème} et 15^{ème} jour lunaire de sak mois. Li ti recommande bane croyants pou garde *Roza* pendant Muharram, aussi *Roza* le jour d'Arafat (pou Hajj), et bane six jours *Roza* du mois de Shawaal – bane *Roza Nafils*, etc.

Nous la vie après **RAMZAAN** faudé pas li amplifier par bane l'ambitions de Shaytane. Nous la vie bizin ene continuation de saki nous adopter de bons dès ki nous ti trouve la lune Ramzaan. Ki nous ti faire ? Nous ti consacrer nous dans *Salat/ Namaz* (la prière) et toutes sortes d'actes *Ibaadat*. Nous fine fer zéffort pou

reste lor le droit chemin, et zot tous fine conne garde zot *Parda* pendant sa mois là, ki li de côté missiés et madames aussi.

L'après-Ramzaan li en fin de compte ene interrogation et ene réflexion pour sakaine d'entre nous. Sa la vie ici-bas là li seulement temporaire, et ene jour na pas ene jour nous tous pou bizin retourne vers Allah. Alors nous bizin accepter ki bane épreuves de toutes sortes pou touche nous, mais du moment nous reste ferme et prend patience aussi sans ki nous perdi nous confiance dans Allah, alors c'est Allah Li-même ki pou enlève tous difficultés et pou dirige nous vers la lumière. Li pou montrer ki Li avec nous et pou guide nous dans saki bon pour nous.

Alor, nous bizin conne place nous confiance en Allah et contigne faire le bien et reste attacher à Allah et azordi jour dans l'époque de So Khalifatullah, ene conseil mo dire zot, pas tourne les dos. Profite de bane bénédictions divines sans pareil, ki ou pas pou retrouver encore. Ou personnellement, ou pas pou retrouver sa parski ou la vie lor sa la terre là limiter, mais demain ou bane zenfants et ou bane ti-zenfants et arrières ti-zenfants, zot ki pou trouver. Peut-être ou, ou pé rejette la vérité azordi, mais demain ou bane zenfants pas pou vine couma ou. Zot, zot capave gagne sa bénédiction divine là pou reconnaite et accepter la vérité. En vérité tout possible avec Allah. Li capave change ene lécoeur roche et fer li ene lécoeur ki rempli d'amour pour Allah et So Messenger et sa même dimoune là, ki auparavant ti ene grand l'ennemi, li-même, pareil couma Hazrat Umar (ra) li capave vine ene plus grand aide pour la cause d'Allah. Allah faire ce qu'il veut sans rende compte à personne. *Insha-Allah*.

Ki Allah transforme nous la vie en saki meilleure et durable dans sa la vie ici-bas là et dans *Aakhérat* et ki nous contigner avec nous bane bon l'habitudes ki nous fine gagner pendant Ramzaan afin ki nous marche vers la victoire avec bane bénédictions d'Allah. *Insha-Allah, Ameen*.